

REALA ENTRENATZAILE BILA. Orain hamar egun Alonsok Realat utzi zuenetik, Donostiako taldea entrenatzaile gabe dago. Baina Uranga presidenteak dioenez, oso litekeena da astearte honetan edukitzea. Toshack fitxatu nahi dute. Maite dute.

Luis Urangak asteartean fitxatu nahi du John Toshack, «urte askorako»

Realeko presidentea urtarrilaren 2an Saint Ettienera doa fitxaketa lotzera, «hura prest baitago etortzeko»



EGUNKARIA

Toshack eta Uranga, Zubietan, orain urte batzuk ateratako argazkian. Haien ondoan Iriarte, egun Realeko behin-behineko entrenatzailea.

Ignacio Galloren saioa, «interes partikularren arabera mugimendua»

E. Esnaola | DONOSTIA

Ignacio Gallo Gipuzkoako Poliklinikako buruaren ekimena berriro kritikatu zuen atzo Luis Uranga Realeko egungo presidentea. Lehengo asteartean «presaka» ibiltzea leporatu zion Urangak hari. Atzo, berriz, esan zuen ez duela ulertzen zertara datorren Galloren ekimena. «Gertatu berri diren mugimenduak ez ditut ulertzen. Badirudi interes partikularren arabera mugimenduak direla, eta ez klubeko interes orokorren arabera, eta guk interes orokorren arabera mugitu behar dugu. Ez ditut ulertzen mugimendu hauek, zeren eta kasu onenean ere ez litzateke iritsiko entrenatzaile berria fitxatzera; hau da, fitxaketak ezingo litzuke egin klubeko Administrazio Kontseilu berriak».

Gallok Realeko akzio kopuruaren %5 baino gehiago eraman zituen herenegun arratsaldean, notaritza baten bitartez, klubeko egoitzara, eta orain Administrazio Kontseiluko lan talde batek dokumentazio hori aztertzen dihardu, akzionista guztien sinadurak balekoak direla egiaztatzeko. Behin hori egin ondoren, Kontseiluak txosten bat osatuko du. Urangak martxoaren 23rako iragarri zuen Realeko Ezohiko Batzar Orokorra, baina lehenago egin beharko dute. Baliteke otsailaren hasiera-hasieran egitea batzar hori.

Enekoitz Esnaola | DONOSTIA

Luis Urangak John Toshack galestarra nahi du Realeko entrenatzaile posturako. Amorratzen dago hura ekartzeko. Horrenbesteko gogo du, ezen atzo aitortu egin baitzuen Toshack fitxatu nahi duela, asteartean bertan —urtarrilaren 2an—, eta Urangak aldeztu aurretik oso-oso kasu gutxitan aitortzen du zerbait; gauzak itxitakoan gustatzen zaio hitz egitea. Orain, ordea, Administrazio Kontseiluari kontrario bat atera zaio klubeko lehendakartzarako bidean —Ignacio Gallo—, eta zerbait saldu beharrean dago. Eta Toshack ekarri nahi dutela dio.

Harekin hitz egiten ere hasi dira, eta «aurreratuta» daude negoziazioak, «baina oraindik egin gabe dago benetako harre-

mana», Urangak atzo Zubietan esan zuenez. Toshack Frantziako Ligan dabil lanean orain, Saint Etienne taldean orain dela hiru bat hilabetetik, eta Realak haraino joateko asmoa du urtarrilaren 2an. Baikor da Uranga, eta atzo esan zuenez behintzat, oso litekeena da astearterako galestarra fitxatzea. «Haren kontratuari errespetua izango diogu, baina guztia konpontzea espero dugu, Toshack gizon garrantzitsua baita klub honen historian. Bi arotan zortzi urte pasatu ditu hemen, eta ea beste urte asko pasatzen dituen».

Realeko egungo presidentea oso ondo ezagutzen du galestarra, eta segur dio entrenatzaileak gogoz hartuko lukeela Realat. «Toshackek ez dio beldurrik erronkari. Nik uste prest

ESANAK

LUIS URANGA
(Realeko presidentea)

«Negoizazioak aurreratuta daude, baina egin gabe dago benetako harremana»

«Konpontzea espero dugu, Toshack gizon garrantzitsua baita klub honen historian»

«Hark ez dio beldurrik erronkari, galtzeko gehiago duen arren irabazteko baino»

dagoelako hona etortzeko, betiere Saint Etienerekin akordio batera iritsiko balitz». Hori dela eta, Urangak «eskertu» egiten du haren jarrera, une hauetan, Realat Espainiako Lehen Mailako sailkapeneko azkeneko tokiari dagoen honetan, «hainbeste ospe izanik, galtzeko gehiago duelako irabazteko baino».

Periko Alonsok taldea uztea erabaki zuen egunean jakin zen Realak entrenatzaile galestarrengana joko zuela —hilaren 22an—, baina harrezkero Toshackek ez du hitz erdirik esan, zalea bada ere Realari buruz mintzatzeko.

Urangak esan bezala, hirugarren aroa luke Toshackek Donostiako klubean. Lehenengoa, 1985etik 1989a arte egon zen. Gero, 1991tik 1995a arte.